

## ■ ORD LA VITA DA LUDMILLA CAHENZLI

# Eugen survegn la chautscha da far bogn da Leuenberger

Jau sun per la Leuthard, di Eugen Cahenzli. Igl è dumengia avantmezdi. Il solver è sin maisa, e la gasetta da la dumengia schai sparpagliada per ils chantuns enturn. Jau, Ludmilla Cahenzli, sun sa chapescha era per la Leuthard, ma jau fatsch si ina tschera d'experta e ditg: «Ma la Leuthard na vegn mai elegida.»

«Cler ch'ella vegn elegida», di Eugen. «Ella è la finala la presidenta da la pcd.»

«Schon, ma sco presidenta da la pcd na gudogna ella schuber nagut. Ma sco cussegliera federala avess ella pussanza ed ina bella paja. Manegias ti propi ch'ils vegls magnats da la pcd sur laschan quest bel post a la Leuthard? Mai e pli mai!» Jau fatsch anc adina ina tschera d'experta.

«Ma il job da presidenta fa ella fitg bain. Jau chatt ch'ella fiss era ina buna cussegliera federala.»

«Cler, ch'ella fa bain ses job. Perquai han ins era mess ella sidavanttiers. Sch'ins mettiss numnadain davantiers quels schanis che han propi da dir insatge en la pcd, lura n'elegiss gea nagi-

na pli quella partida. Guarda doch sin Deiss!» Jau fatsch ina tschera da super-experta. Ed Eugen sa lascha propi persvader, probabel pli fitg da mia tschera che da mes arguments.

«Jau sun en mintga cas per la Leuthard», di Eugen da quai mudest ed aschunta. «Ella è in zitg sco la Metzler. Jau n'hai mai legi uschè blers artitgels sur da la politica sco cura che la Metzler aveva en sia rassa curta cotschna.»

Quai cun la rassa curta cotschna sesa. Jau cun mias chommas plain avainas na pos numnadain betg purtar rassas curtas. E che mes um, che di uschiglio che politica saja la chaussa la pli lungurusa dal mund, legia artitgels sur da la Metzler cun rassa curta e cun bellas chommas, gliez è ferm tubac. Mo spetga!

Jau cumenz a tegnair in referat. Jau fatsch ina fatscha severa ed ina mina da super-super-experta. «Tipic umens! Adina vegn la politica da las dunnas reducida sin la vestgiadura. Quai è sexist e total dasperas.» Eugen strangla giudent l'ultim gipfel entant ch'jau referesch

davart il dretg da votar da las dunnas en Svizra, davart las gravattas da politichers svizzers e davart ils basats ed urats en il cussegl federal.

Pir cura ch'jau cumenz a discurre davart il tgil blut da la Merkel vegn Eugen era puspè en cun il pled. Quella giada essan nus units e sevilain omadus sur dals paparazzis che na laschan betg cunbun ils politichers.

«Apropos», ditg jau. «Has vesì ils maletgs da Leuenberger en las chautschas da far bogn?»

«Na», di Eugen. «Pertge?»

«Las chautschas da far bogn da Leuenberger èn atgnain anc bellas: stgirblauas, cun finas decentas sdrimas magistralas. Jau cumpr era da quellas per tai», ditg jau.

«Ma jau hai gea anc trais chautschas da far bogn, jau na dovr naginas», protestescha Eugen.

«Quai na fa nagut. Jau cumpr tuttina da quellas.»

Mia vendetga per la rassa curta cotschna da Metzler!